



Khutba Jummah

HADHRAT MUHYI-UD-DIN AL-KHALIFATULLAH
Munir Ahmad Azim

07 Juillet 2017
(12 Shawwal 1438 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor « *La mort de Jésus (as)* »:

وَمَا مُحَمَّدٌ إِلَّا رَسُولٌ قَدْ خَلَتْ مِنْ قَبْلِهِ الرُّسُلُ أَفَأَيْنَ مَاتَ أَوْ قُتِلَ انْقَلَبْتُمْ عَلَى أَعْقَابِكُمْ وَمَنْ يَنْقَلِبْ عَلَى عَقْبَيْهِ فَلَنْ يَضُرَّ اللَّهَ شَيْئًا وَسَيَجْزِي اللَّهُ الشَّاكِرِينَ

Wa maa Muhammadun 'illaa Rasool: qad khalat min-qablihir-rusul; 'afa 'immaata 'aw qutilan-qalabtum 'alaaa 'a'-qaabikum? Wa mayy-yanqalib 'alaa 'aqibayhi falayy-yadurrallaaha shay-'aa; wa sa-yaj-zillaahush-Shaakiriin.

Muhammad li nek ene Messenger; en vérité, tous bane messagers fine morts avant li. Si arriver li mort, ou zot touye li, eski zot pou tourne lor zot talons (et aller)? Celui ki pou tourne lor so talons pas pou nuire en nannié à Allah; et Allah pou récompense bientôt bane ki montrer reconnaissance. (Al-Imran 3: 145).

Ene fausse rumeur ti répande à Uhud, ki dire ki bane l'ennemi fine réussi touye le Saint Prophète Muhammad (saws) et li fine mort. Sa verset là faire allusion à sa incident là et veut dire ki même si sa rumeur là ti fondé, sa pas ti supposé faire bane

croyant zot la foi bougé. Hazrat Muhammad (saws) ti nek ene prophète et couma bane les autres prophètes avant li fine morts, li aussi li pou mort. Zis Allah tousel, le Dieu de l'Islam, le Dieu Unique et Suprême ki vive éternellement.

1^{ère} Preuve

Kan sept ans après l'incident à Uhud le Saint prophète (saws) fine mort, Hazrat Umar (ra) fine debouté avec ene chagrin terrible dans Masjid de Madina, et li fine brandi so l'épée, et fine dire: « *Celui ki dire ki le prophète d'Allah fine mort, mo pou saute so licou. Li pas fine mort mais li fine alle kot so Rab pareil couma Moussa (as) ti alle kot so Rab et li pou révini pou puni bane hypocrites.* »

À ce moment là, Hazrat Abou Bakr (ra), ki pas ti présent au moment kan le prophète fine mort, fine vini vite kan li fine entende nouvelle de la mort de Hazrat Muhammad (saws), et li fine alle directe dans la chambre du prophète et constatant ki li ti effectivement mort, li fine embrasse li lor so front en disant: « *Couma to doux dans la mort couma to ti doux kan to ti vivant, et sûrement Allah pas pou donne toi deux la mort.* »

Ensuite il sorti, avec ene fermeté, et li fine demande l'assemblée ki ti présent dans Masjid:

« *Ô bane dimounes! Celui ki ti pé adore Muhammad, alor ki li apprane (ki li mette sa bien dans so l'esprit) ki Muhammad fine mort; et celui ki adore Allah, ki li rassurer ki Allah Li Vivant et ki Li pas pou mort zamais!* »

Et li fine récite avec zot sa verset là: « **Muhammad li nek ene Messenger; en vérité, tous bane messagers fine morts avant li. Si arriver li mort, ou zot touye li, eski zot pou tourne lor zot talons (et aller)?** » (Al-Imran 3: 145).

Li ti pé rode dire ki li pas ti étonnant ditout dans sa bane circonstances là ki le Saint Prophète (saws) aussi fine mort. Kan li fine entende sa verset bien approprié là, Hazrat Umar (ra) et tous bane les autres fine convaincu de la mort du prophète et zot fine plongé dans ene grand deuil. De sa façon là, sa verset là prouve avec clarté ki tous bane prophètes ki ti vini avant nous bien-aimé prophète Muhammad (saws), zot tous fine fini mort parski si même ene sel parmi zot ti encore vivant, alor Hazrat Abu Bakr Siddiq ni aucaine les autres musulmans pas ti pou capave servi sa verset là pou prouve la mort du Saint Prophète (saws).

2^{ème} Preuve

« Le Messie, fils de Marie, ti nek ene Messenger. Bane les autres messagers fine morts avant li. Et so mama ti ene véridique. Et tous deux ti manger (pou vive). Guette couma Nous explique zot Nous versets, et guette couma zot tourne lédos à la vérité. » (Al-Maida 5: 76).

Sa verset là veut dire ki tous les prophètes avant Jésus ti morts et bane musulmans aussi zot d'accord lor sa point là. Le fait ki bane termes identiques fine employé au sujet de Hazrat Muhammad (saws), alor ki faire ena sa causer là ki ene prophète avant li pas encore mort? Sa deux versets ki mo fine mentionner là ressembler et veut dire même zaffaire.

Ene l'autre kitchose ki Allah enseigne nous dans sa bane versets là, c'est ki: **« Tous les deux ti manger (pou vive). »** (Al-Maida 5: 76).

C'est-à-dire, Jésus et so mama, tous les deux ti bane êtres humains. Zot pas ti ena aucaine boute de divinité dans zot, et ni zot ti ena bane lécorps spirituels pour monte dans lé ciel. La loi d'Allah concernant bane êtres humains, c'est ki Allah fine donne zot bane lécorps terrestres doté d'ene l'âme, et tanque ki l'âme là dans sa lécorps là, zamais li pas pou capave fer sa lécorps terrestre là, sa lécorps la terre là monte au ciel et vive dans léciel avec sa lécorps là. Mais l'âme li capave voyagé mais so lécorps physique, terrestre, reste toujours lor la terre, et sa arriver dans trois options: sois dans sommeil, pendant la révélation et inspirations, et l'autre saki définitif c'est la mort. Et dans tous les cas, lécorps la terre là li reste lor la terre, et ene jour na pas ene jour li pou bizin enterré dans sa la terre là, et non pas élever au ciel.

En réfléchissant lor sa bane arguments là, eski ena ene sel musulman ki capave dire ki Jésus li encore vivant au ciel? Si oui, alor ki li décider ene fois pour toute dans li-même, au plus profond de li-même, si pas li encore ene musulman ou si li ena l'intention vine chrétien. Li bizin fer sa analyse là.

3^{ème} Preuve

« Et Nous pas ti donne zot (c'est-à-dire, bane Messagers là) ene lécorps ki pas ti bizin mange nourriture, et zot pas ti vive éternellement non plus. » (Al-Anbiya 21: 9).

C'est-à-dire ki zot lécorps li pareil couma bane les autres dimounes, ainsi ki zot l'âge; zot pas jouir de l'immortalité mais zot passe par la mort pour arrive ziska Allah, pareil couma les autres dimounes.

Écoutez, mo bane frères et sœurs! Allah bien encolère concernant sa perception ki bane musulmans ena azordi zour là ki nous prophète fine mort et ki Jésus touzour vivant. Allah (swt) dire: « **Zamais Nous ti accorde à aucaine dimoune avant toi l'éternité. Si toi, to mort, eski zot pou vivre éternellement. Tout nâme bizin goûte la mort.** » (Al-Anbiya 21: 35-36).

Li déplorable ki bane théologiens *bida'tis* (c'est-à-dire, bane ki fine ajoute bocou mauvais kitchose dans *Shariah* - la loi de l'Islam) et zot bane *Mourides* ignorants pé prétende content le Saint Prophète Muhammad (saws), parski zot de nos jours zot ena même croyance ki bane Chrétiens ena. C'est la raison pourquoi bane musulmans ignorants fine embrasse le christianisme en masse, mais sa pas pé fer aucaine l'effet lor sa bane théologiens là.

Ouvert zot lizié, Ô mo bane frères et sœurs musulmans! Li pas ene l'honneur sa ki Hazrat Issa (as) li vivant au ciel, tandique ki nous plus grand prophète (saws) li fine enterré, mort lor sa la terre là! Ki Allah préserve nous de bane mauvais actions ki sa bane Ulémas pé fer kot zot pé entraine bane musulmans vers la perdition! *Ameen*.